

25. april

Danmarkimi politini pisartutut Kalaallit Nunaanni politiit nalunaaruteqartoqarneraniit qisuariarnissap tungaanut piffissamik atorneqartartumik nalunaarsuisalernissaat pillugu Naalakkersuisut danskit inatsisinik atortitsinermut ministerianut attaveqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Justus Hansen, Demokraatit)

Inatsisartunut ilaasortap Justus Hansenip Demokraatineersup aalajangiiffigisassatut siunnersuutaanut soqutigintartumut Siumumiit imaattumik oqaaseqaateqassaagut.

Sineriassuatsinni innuttaasut toqqissisimallutik inooqataanissaat Siumumiit pingaarluinnartutut isumaqarfigaarput, arlaatigullu pinartumik pisoqartillugu pisoqassatilluguluunniit oqartussaasunit sullinneqarnissap kiffartuunneqarnissallu sapinngisamik pitsaasumik, isumannaatumik kiisalu pilertortumik oqartussaasunit periuserineqartariaqartoq Siumumi isumaqarluta.

Danmarkimi politini pisartutut qisuariarnissap tungaanut piffissamik atorneqartartumik nalunaarsuisalersimanagerit pitsaasumik ajunngitsumillu kinguneqarsimanagerat nuannaarutissaasoq Siumumi isumaqarpugut, taamaattumillu periutsip nunatsinni atulersinneqarsinnaanera isumaliutigisariaqartoq Siumumi isumaqarluta.

Soorlu siunnersuuteqartup erseqqissaatigigaa, nunatsinni pissutsit Danmarkimisuulli assersuunneqarsinnaanngitsut arlalippassuupput, taamaattumik periuseq taanna eqqunneqassappat nunatsinnut naleqqussakkamik ilusilersuisoqartariaqartoq Siumumiit pingaaruteqartutut isumaqarfigaarput.

Nunatta isorartunersua, najugaqariaaserput, silap pinngortitallu unammilligassartai, politeeqarfii inuttaqassusaat, nunaqarfiit kommunefogedeqarnerat assigisaallu tassaapput nunatsinni innuttaasut pinartoqartillugu politiiniit ornikkasuarneqarnissaannut assigiinngitsutigut killilersuutaasinnaasut, tamakkuuppullu periutsip eqqunneqarnissaanut immikkut isiginiarlugit ilusilersuinissami eqqarsaatigineqartariaqartut.

Assersuutigiinnarlugu nunaqarfimmi arlaatigut pinartoqarsimappat ornikkasuartariaqakkamik, nunaqarfillu kommunefogedeqarnani, silalu assersuutigiinnarlugu timmiffigineqarsinnaanani, taamaasillunilu angallammik aatsaat orinigunnissaq periarfissaalluni, taava imaaliallaannaq ornigunnissaq ajornakusoorsinnaaqisoq takorloorsinnaavarput.

Taamaattumik pingaaruteqartorujussuuvoq qisuariarnissap tungaanut piffissamik atorneqartartumik nalunaarsuisalernissat nunatsinnut tulluussakkamik aaqqiissuteqarfiginissaat.

Taamaakkaluartoq Siumumi isumaqarpugut pinartoqartillugu politiit ornigukkasuartarnerinut atattillugu piffissaq atortagaat annertunerusumik paasisaqarfigissallugu, taamatuttaaq sulii pilertornerusumik orniguttarnerit anguneqassappata aqquutit suut atorlugit ingerlasoqartariaqarneranik politikkikkut anguniagaqartoqartariaqartoq Siumumiit isumaqarluta.

Allatut oqaatigalugu: Kalaallit Nunaanni politiit nalunaaruteqartoqarneraniit qisuariarnissap tungaanut piffissamik atorneqartartumik nalunaarsuisalernissaannut periutsumik nunatsinnut naleqquttumik atuutitsilernissaq misissorneqaqqaartariaqarpoq.

Taamatut oqaaseqarluta Siumumiit siunnersuut manna aappassaaneerneqartinnagu Inatsisinut ataatsimiititaliami suliarineqarnissaa inassutigaarput.

Anders Olsen
Siumut